

## MANDI A DUCJ!

Us vin za visât cuntune lungje mail su la setemane che e ven e che nus viôt une vore impegnâts ator pal Friûl, ma i tignòn a dîlu a ducj chei che a passin par chi ogni tant. Anin par ordin.

## VÔS DE BASSE 2019 - CE CONTINO TE BASSE

### MARTARS 26 aes 20.30 A PRISSININS

Al è partît, par il tierç an di file, il **Concors Vôs de Basse**, che al è dediât nuiemancul che a lis contis curtis par furlan. Al è facil di partecipâ, nol coste nuie e si puedin vinci ancje bêçs in libris. Ma il discors al è ancje un altri, che al va plui innà di chest. Se o volìn dà **un segnâl fuart e un sburt a lis iniziativis che a a metin dongje culture e lenghe furlane**, e che a lu fasin doprant la leterature che nus plâs une vore achì in osterie, o varessin di scomençâ propit di chest concors, metût adun pes contis e cuntun sfuarç economic/organizatîf di un pôcs di Comuns. Par chest, secont nô di Contecurte, mai come in chescj timps al è impuartant partecipâ, inressi la vôs (de basse), ancje dome par dî di jessi presincj, di vê a cûr no dome il scrivi contis ma ancje il leilis e lis ativitâts peadis ae culture. Ven a stâi... Partecipait contecurtârs!!

E propite par marcâ la nestri poie al concors, noaltris di Contecurte o metarin adun **un piçul spetacul di contis dentri de serade di presentazion che si davuelzarà a PRISSININS, MARTARS DI SERE**, ae vote e mieze. L'event si clame **Ce contino te basse**. Se o sês di chês bandis e je simpri une buine ocasion par scoltâ a cjantâ la nestre massarie intal due acustic des ConFusione, scoltâ contis, fâ dos cjacaris e bevi alc insieme ae fin de serade.

Comun di Prissinins



# Ce contino te Basse

*Spetacul di contis curtis cui vincidôrs des edizions passadis  
dal concurs Vos de Basse*

**MARTARS AI 26 DI NOVEMBAR DAL 2019  
AES 8 E MIEZE DI SERE  
CENTRI CIVIC DI PRISSININS**  
*vie dai Cavalieri Teutonici, 25*

*Une serade par cure di*

SPORTEL ASSOCIÂT PE LENGHE FURLANE DAI COMUNS DI  
CJARLINS, GONÂRS, MUÇANE, PORPÊT, PRISSININS E SAN ZORÇ DI NOIÂR

*cun*

**CHEI DI**



*inte part di contadôrs, sticeboris e ucepopul*

*e cu lis vôs, lis notis e la biele presince di* **ConFusione**

duo acustico

**VIE PE SERADE A VIGNARAN DÂTS FÛR I ATESTÂTS  
DAL CORS PRATIC DI LENGHE E CULTURE FURLANE DAL 2019**  
inmaneât de Societât Filologjiche Furlane cul contribût de ARLeF

**GHRINGHEL PAR CUI CHE AL RESTE FIN AE FIN**

## **SCRIVI PAR FURLAN, VÔS A CONFRONT**

### **JOIBE AI 28 AES 18.00 A UDIN, IN BIBLIOTECHE CIVICHE**

Al è timp di **SUNS EUROPE**, il festival des lenghis minoritariis che al cjape dentri so redut la musiche, ma al tire dongje ancje la leteradure e la culture in gjenerâl. Nô de Ostarie o sin dai convints prudeladôrs di cheste iniziative e us invidin a dâ un cuc ai apontaments peâts al festival, **che o cjatais tal programe oficiâl**. (Se propite no cumbinâs pe serade finâl dait un cuc a lis seradis che a vegnin prime, che a son dutis di rive jù).

In cheste suaze, simpri fevelant di leterature, il vuestri ostîr e il nestri contecurtâr Gianluca Franco, **joibe 28 aes 6 sot sere li de biblioteche civiche Joppi di Udin**, a vignaran coinvoltzûts intun **dibatit relatîf ai premis leteraris e a lis vôs furlanis che a scrivin**. Condutôrs, la nestre coghe, Serena Fogolini e Walter Tomada, plui altris ospits. Us prometin che o cirarin di tignî cjalde la discussion!

## **CONTÂ CEMÛT CONTÂ**

### **VINARS AI 29 A LISTIZE, aes 21.00, BAR AGANES**

Forsit us sarâ rivade te orele la vôs che **il vuestri fidât ostîr al à vinçût il premi San Simon** cuntune (altre) racuelte di contis, **Bisest**, e in bande di lui, il numar doi de ostarie, il Famei Checo Tam, al è stât segnalât pal so lavôr. Poben, in grazie de poie de UTE dal so Comun, **Rafaël Serafin al vignarà metût sul banc dai imputâts e al “contarà cemût che al conte”**. Al varès vût di jessi un incuintri cul autôr, ma al somee che al deventarà un alc di diferent. Se o vês gust di scuvierzi cemût che a son nassudis lis contis dai libris dal ostîr e cemût che al à sielt di scrivilis in chê maniere e no intune altre (E se o vês gust di scoltâ i testimonis che a lein cualchi conte, cuissà, magari inedite) no vês di fâ altri che vignî a **Listize, vinars ai 29, li dal bar Aganes in place, aes 21.00**. Dutcâs o cjatais chi sot ancje une locandine di chest event.

